

LA USC DI LADINS – VENERDI' 7 MARZO 2014

L cianton dla Union

Generela cun dissertazions

Nstadi iel stat la reunion generela dla Union di Ladins de Gherdëina, cun la prejentazion dla dissertazions y di lëures da diplom

Lies - La Union di Ladins de Gherdëina à abù si reunion generela n venerdì dan otodi. Per l'ucajion iel sambèn uni prejentà la relazion d'atività fata ntan l'ann 2013 y chëla udada danora per chëst ann. Pona iel uni fat l'rëndicont de

cassa. Na nuvità de chëst ann ie che la Union di Ladins de Gherdëina à nce prejenté la dissertazions y i lëures da diplom che à da n fé cun argumënc dla Ladinia y che ie unic dac ju tla Biblioteca Ladina dla Cësa di Ladins. Ai/ala autëurs/res àn te

chësta ucajion ulù ti sèurandé n pitl pensier de recunescënza, ajache, da coche à dit l'presidënt Stefan Kasslatter, „giapa la dissertazions te nosta biblioteca ladina daniëura si l'lech meriteda, les ie per l'vijitadëur n bon mesun de consultazion y de stude pra

tematiches d'uni sort, coche storia, rujenada ladina, scola ladina, geologia, ert, economia tla valedes ladines y n.i., che à da n fé cun duta la Ladinia!“ Kasslatter nvieia mo n iede tres la USC “duta chëla persones che à fat na dissertazion o n lëur da diplom sun vel’

argumënc che toca la Ladinia, nce ti ani passé, y che ne l'ëssa mo nia data ju, a purté na copia te nosta biblioteca, ntan i orares de biblioteca: de lunesc y de merdi dala 16.00 ala 18.00, y de mierculdi, juebia y venerdì dala 10.00 ala 12.00!“

Union di Ladins de Gherdëina

Cësa di Ladins,
str. Rezia 83,
39046 Urtijëi
Tel: 0471 796870, e-mail: info@ulg.it



Program dl'atività fata tl ann 2013

Calënder de Gherdëina

Coche da tradizion à la Union di Ladins de Gherdëina dat ora si «Calënder de Gherdëina», chëst iede per l'ann 2014, cun d'uni sort de cuntribuc che trata de argumënc desferënc, ti dajan te chësta edizion l'pëis, sibe pra l'calënder di mësc che cun articuli tla publicazion nstëssa, ala Dolomites, Patrimone mundial d'umanità UNESCO. Oradechël iel tlo da abiné cuntribuc de storia dla valedes ladines cun referimënt particular a Gherdëina, d'ert, de flora y fauna, de religion, de sport y n.i. y ntraunides suzedudes te nosta valeda via per l'ann 2013.

L cianton dla Union

La culaburazion cun la zaita „La USC di Ladins“, che vën ora uni ena, ie jita inant coche i ani dant y n iede al mësc vën nce ora la rubrica dal titol „L cianton dla Union“.

La Biblioteca Ladina

La Biblioteca ladina spezialiseda tl ciamp dl'ladin, dla Union di Ladins de Gherdëina, pieta na gran vela de vedli libri de gran valor, ma nce libri che trata tematiches ladines y che reverda i ladins, dantaldu t'ciamp dla rujenada ladina y dla storia dla Ladinia y dl Tirol.

L „Museum de Gherdëina“ à ënghe si sënta tla Cësa di Ladins y chësc cumporta spëises sèurapror, dantaldu t'cont dl'mantenimënt dla cësa.

Proiet biblioteca ladina

Cërder y urdiné i libri do categories nueves. Nà metù man a cataloghisé y registré diitalmënter i libri do l'sistem nuef cun n barcode per uni liber.

Reunion Generela dla Union di Ladins de Gherdëina

La ie stata ai 22 de fauré dala 20.30 tla biblioteca ladina de

nosta sënta tla Cësa di Ladins a Urtijëi.

Azion per i cumëmbri dai 4 ai 15 de merz 2013

Te chësc tēp à duc i scric ite pudù uni te nosta biblioteca a se cri ora na publicazion, n CD o chertes d'audanzen che piton coche sēni de recunescënza.

Curs de cuginé spëisa tradiziunela ladina cun Margherita Mureda Schmalz

L curs ie stat ai 16 y 23 de april dala 20.00 tla cësadafuech dla Cësa Lia Mostra d'ert a Urtijëi. L à fat pea 16 persones. L ie uni cuginé jopa da fersëiles cun patac y craut, roba da fana coche fanziëutes da pan y da mëles, fanedes, n bon pueßl, amelec d'uni sort y n.i. Davia che l'ie uni frequënta scialdi bēn, cialerons de mëter a ji na tel' sort de curs mo n iede n auter ann a na moda che nce for plu jēnt jēuna mpere a cuginé spëisa ladina.

Trasmiscion culturale sun Radio Gherdëina

Chëstes ie states da jené a april 2013 y da tober nchin de dezëmber 2013. Rudi Kostner à ino purtá dant argumënc culturei d'uni sort, cun l'atività dla Union di Ladins, atualità, curtiuteies n cont dla rujenada ladina, mujiga ladina y n.i., y ntर्वistes a persones che lëura tl ciamp culturel ladin (un n iede al mësc).

Curs de ladin per progredii.

L moto fova: Co rejōnen pa drët? Dic y manieres de di cun David Lardschneider, per de ndut 9 ëura de lezion tla biblioteca dla Cësa di Ladins a Urtijëi. L curs à scumencià ai 4 de april 2013 dala 20.00 ala 21.30 y ie jit inant per sies iedes. L à fat pea set persones.

Èura de stories per mutons dla scola elementera ntan l'lijëndes

La Union di Ladins de Gherdëina à metù a ji 4 ëura de stories tla biblioteca Tresl Gruber de S. Cristina. I mëndri mustrova n gran

nteres. Gēn ie i mutons y la mutans unides a scuté su la stories cuntedes da Sofia Stuflesser tla biblioteca Tresl Gruber de S. Cristina. La Union di Ladins de Gherdëina à purtá inant l'proiet che ie bele uni scumencià l'ann 2011 y che va for inant da d'anscuida te na biblioteca dla valeda y da d'autonn tla Cësa di Ladins. I mëndri mostra for n gran nteres ala stories y ala lijëndes ladines y se ncunforta nce a pudei daldó pastelné y desseniē zechē che reverda l'argumënt tratá.

Presentazion dl liber “Na vita duta en rima”

La Union di Ladins de Gherdëina à presentá n venerdì ai 24 de mei 2013, dala 17.30 tla biblioteca dla Cësa di Ladins a Urtijëi l'liber de rimes per ladin “Na vita duta en rima” de Babi da Nudrē. Te na blota publicazion, abelida nce da n valguna fotografies, iel uni abinà adum passa 100 poejes partides ite te 8 capituli. L argumënc traitei dal'autëura ladina Barbara Kostner Costalunga va dala mprescions vivudes di per di ntan si vita longia: tlo iel l'lech per rimes sibe sun la flora y fauna, che sun la familia, dala valeda de Gherdëina ala sajons y festes, dala lecurdanzen ala religion y n.i. L liber ie uni presentá mo n iede n mierculdi ai 29 de mei 2013 dala 14.00 tla sala di seniores te colonia bastie de Sëlva.

2. edizion dl Domesdi leterer “Alalergia”

N venerdì ai 26 de luglio 2013 dala 18.00 tl verzon dla Cësa di Ladins a Urtijëi. La 5 autëurs ladines Rut Bernardi y Elisabeth Kostner de Gherdëina, Tiziana Ghedina de Ampéz, Olimpia Rasom dala Val de Fascia, Ruth Videsott dala Val Badia à liet dant si tesé de prosa y poejes cun curnisc musichela dla scola de mujiga de Gherdëina, dadedó à suná l'armonica Mattia Demetz da Sulé, campion mundial juniores de suné l'armonica. L ie nce uni pitá vel' bon bucon cun cërces de vins. Mëisa de libri de literatura ladina.

Marcià de segra Sacun

N ucajion dl Marcià Segra Sacun ai 14 de tober à la Union di Ladins de Gherdëina ino fat pea cun n stont tl verzon dla Cësa di Ladins

ulache l'ie uni pitá n bon taier de panicia cun bales o panicia cun tirtles, bales cun capusc y fersëiles y per l'bech dëuc crafons da segra. Pra l'stont dla Union di Ladins fovel nce:

Juech de tré i struplons cun de bie pesé da vëncer.

Mëisa de libri y gurmieit brums per gran y pitli.

Chi che fajova n abunamënt nuef per La USC di Ladins paiova ite per l'2014 ma giapova debant la zaita bele dai 1. de nùvember 2013 inant!

Curs de ladin

L curs de grafia ie uni teni sēn d'autonn, l curs fova nce adatá per se njeniē ca al eiam de trilinguism. L curs ie uni fat sies iedes per n'ëura y mesa al iede, de ndut 9 ëura. L referēt fova David Lardschneider. L à fat pea 10 persones.

Di dla biblioteches “Diaul de n scapin”

N ucajion dl di dla biblioteches n sada ai 26 de tober à la Union di Ladins de Gherdëina metù a ji n blót domesdi tla biblioteca ladina tla Cësa di Ladins per mutons y mutans dai ot ani insù. Sofia à cuntá stories striunides da pel de gialina. Da dedó iel uni pastelné ora de n vedl scapin/scufon d'uni sort de stries, diaui, spirc, orchì, mostri, malans y d'autra canaies.

Èura de stories per mutons y mutans dla scola elementera ntan l'tēp d'avēnt

Milva Mussner à cuntá n juebia do scola, ai 28 de nùvember, ai 12 y 19 de dezëmber for dala 16.30 ala 17.30 tla Biblioteca Ladina tla Cësa di Ladins a Urtijëi, uni iede na storia da Nadel y da dedó à duc i mutons y duta la mutans pudù pastelné cun Heidi Stuflesser, dantaldu cun material natürei, un n cumpunēt dla cripl; y ala fin dla finedes à uniun/a pudù se tò pea a cësa si pitla Sacra Familia. L material ie uni metù a disposizion dala Union di Ladins.

Presentazion dl liber “Mi plu bela cianties da Nadel”

Chësta ie stata n venerdì ai 29

de nùvember 2013 dala 18.00 tla Cësa di Ladins. Per l'ucajion à suná Carmen Moroder, Jana Moroder y Julia Kostner cun l'armonica; ciantá à l'Cor di mutons de Runcadic sot ala direzion de Laura Ciechi. La festa de prejentazion dl liber ie unida sluta ju cun na ciantia d'Avēnt ciantada da duc debiereda y da dedó fovel sambēn zechē da pesslë.

Prejentazion dl “Calënder de Gherdëina 2014”

Chësta ie stata n venerdì ai 13 de dezëmber 2013 dala 18.00 tla Cësa di Ladins. Trueups zitadines de Gherdëina à ino scrit articuli nteressanc acumpaniei da de bela fotografies. L argumënt dl calënder di mësc, che reporta i sanc, la lunes y l'oroscop cun na njonta di marcē y di sandis, ie chëst ann stat l'UNESCO, ulache l'ie da udēi de bela fotografies dla Dolomites che ie unides tiutes su d'arpejon dala natura UNESCO. Oradechël iel da abiné tl Calënder 2014 poejes y nce vel' ciantia y cuntribuc de avenimēnc y ntraunides, dala cultura al sport, dala vita dla lies de nosta valeda ala stories de fac nteressanc suzedui te chësc ultim ann. L ne mancia sambēn nia la cronica dl ann passá, la lecurdanza di defonc de nosta pluaniēs y la fotografies di maridei.

Cunlaurazion cun l Museum de Gherdëina

„Nuet longia di museums“ ai 21 de setëmber tla biblioteca dla Cësa di Ladins a Urtijëi cun na mëisa de libri dla stories y cunties da zacan.

Cunlaurazion cun la Union Generela di Ladins dla Dolomites

Pelegrinaje a Baiston ai 15 de setëmber 2013, chëst ann iel uni metù a ji dala Union di Ladins de Fascia. La Union di Ladins de Gherdëina à ino metù a ji n taxi-bus per i pelegrins. N valguni ie nce unic cun l'bel guant dala gherdëina che à sambēn fat na bela paruda.